

永嘉聞見錄

光緒戊子初夏孫
學老人孫衣言署

道光癸卯予視學之江蘿邨學使語予曰永嘉學博孫君兩人砥行厲名耆年篤學君子人也予心志之而未之識踰年秋君以三次秩滿待驗至省接其言論粹如溫如出其先人怡谷侍御著書若干種爲贈益知君稟印庭訓學有淵原意必能俛焉孳孳紹承家業如少翁之於長孺小同之於康成也今歲二月校士東甌君以所著永嘉聞見錄示予蓋將以備方隅之紀載俟輶軒之采獲其用心可謂虛矣觀其摭摭墜簡辯章舊聞稽山川之形勢攷廨宇之廢興訪

殘碣以正傳譌蒐佚事以存故蹟旁及天時物產民俗方言靡不鉅覘兼呈旁羅附益廣記而備言之蓋君貧籬雲之姿婁躡昆蹠銓除冷官箸饌自娛優游於海濱鄒魯二九載矣久於其官則致力也博習於其地則網聞也富鏗而不舍實事求是信而有徵以埃來哲則是編也非一家之言迺一邑之書亦一郡之書也攷郡志輯於乾隆庚辰數十年間或革或因宜損宜益脩明之任責在司牧誠卽此書推而廣之張而相之用以徵是邦之文獻裨舊志之闕扁則稽



鏡之資於是焉在予故泚筆而樂爲之序乙巳季春
吳鍾駿譔

永嘉聞見錄

序

二

此錄多可資攷證處佳書也永嘉之學盛於南宋近
乃鮮有博學多聞之士若采輯力學軼事以風勸邦
人亦教化之一端也新城陳用光識

永嘉聞見錄序

甌郡浙東一大都會也壬寅夏余忝守來甌竊見山川風物終古如斯至人材薈萃著作繁興古今人恆不相及又聞故老相傳數十年來民俗奢靡信巫尙鬼踵事增華往往誌乘所未載心甚惑之迨孫君雨人以永嘉聞見錄相示乃得悉其詳焉孫君以名孝廉司訓永嘉歷年且久嘗以考古之餘網羅遺佚訪容成之故迹溯雁蕩之游蹤觴詠流連無足論矣一二殘碑斷碣必摩挲其下親考識之至一名一物之

永嘉聞見錄

序

三

微亦詳稽曲證折衷至當蓋嗜古好奇之志至老不衰豈徒誇其博聞殫見與抑豈無關於世道人心之大者與夫忠孝節義之事湮沒不彰者多矣學校之制風教之變郡邑之盛衰係焉有心人所爲慨文獻之闕殘也今於耳目所及援古證今考訂得失所謂書缺有聞而其佚乃見他說者固非好學深思之士不能道耳且觀風問俗修葺志乘守土者責也余下車伊始蒐兵簡械日事防禦茲雖海氛已息而簿書紛擾又無暇畱心掌故自惟固陋有志未逮焉昔永

嘉穀諭勞公大與著甌江逸志多爲郡志所錄迄今
距修志之時又幾八十年孫君以聞見所得彙集成
書他日者重修地志廣採博收驗土物之盈虛問謠
俗之沿革必將以是書爲徵信也夫爰爲之序而歸
其帙元和蔡嘉玉

司鐸東嘉於今七載偶有聞見輒喜搜求證之府縣
兩志多與近日之聞見不合且有爲兩志所未錄者
聽睹之餘隨筆疏記聊備遺忘積久遂成卷帙畧爲
排次後先擬付劄牘家鄉詩社諸君嘗有札來詢東
嘉風土人情者當卽以此冊寄贈可省筆墨應對之
煩非僅備異日修志時供秉筆者采輯補錄已也因
記其緣起如此道光十三年長至日兩人孫同元識

永嘉聞見錄卷上

仁和孫同元兩人

余素性恬淡絕少嗜好惟先侍御公所遺手校書

約四五千卷朝夕翻閱手不忍釋間與二三同志者互借善本共相讐校析疑辨難樂此不疲又嘗仿真率會集良友十餘人每月歡敘一二次迭爲賓主拈韻分題隨量飲酒剛迎送之繁文得問學之樂趣丙戌之秋銓選永嘉教諭次年二月束裝就道諸君執手臨歧不勝離別之感余賦留別詩

永嘉聞見錄卷上

四律諸君亦各賦贈行之什卽倩畫友趙次閑之琛寫春江話別圖同邑胡書農學士作序文以弁其卷書農曾於二十餘年前主講東嘉中山書院敘中歷溯舊游皆紀實事也

君負顏鮑之逸才明許鄭之實學京華塵夢能澹於懷博士冷官偏賞其趣矧夫山水首數永嘉是我舊游爲君追述以當持贈以代畫圖憶昔買舟樟亭待潮沙岸擁衾無寐拓篷以觀見夫白白江魚紛紛夜市波盪疑活風來亦腥人聲互喧燈影



如織俄而漁艇解散榜人起呼千霆萬雷一瞬而
過鷺汀鷗渚四望無垠君於此時定當命酒回眺
漁浦朗吟謝詩如畫富春緬懷子久遵桐廬以上
沂經巖瀨而少休漁唱起乎蘆中炊烟騰乎木杪
大魚跳浪仰吞日華白鳥橫空點破山翠攀子陵
之遐躅挹皋羽之清風君於此時定當作賦過瀨
以後江如峽束灘比江多牽挽以前叫喚不絕縱
饒名勝頗妨嘯歌自西徂東捨舟而陸雙竹橫擔
千巖屈盤行行重行行如是百里偪仄復偪仄乃

至一村爲阮窮途無翟岐路平地盡矣高山截然
山如螺旋人則蟻轉下臨絕壑旁通危厓坡陀忽
回隄落千丈趾踵相攝垂外二分魚復蠶叢殆不
過是忠臣孝子畢竟如何中有村居可供旅宿溪
流汨汨瀉乎簷端雲氣蓬蓬塞入窗罅曉復命駕
惘然首塗小憩茅亭以避風雨陰靄四幕如墮甑
中疾雷一聲起自腳底飛電軒掣時漏光明溼雲
往來近可搏弄少焉雌霓東挂一峯放晴涼颼北
吹萬樹如沐變幻千態驚喜一時未審君行亦嘗

覲此奇勝否既下仙都之坂還泛惡溪之流枯蒼
插天其石刻露甌脫瀕海有潮浸淫一舟搖搖三
宿信信應接不暇勝游山陰道中雞犬皆仙疑到
武夷深處若乃櫓聲住雁客夢驚鷗颺風忽興猛
雨羣集長年入水負舟力爭老僕望厓呼樵言救
襪被半溼樽酒全空江神見憐布帆無恙真從破
冢而出難盡大雷之書未審君行亦嘗值此奇險
否行抵州治候交夏初士女昌丰雲山清淑人少
愴楚之習戶承先秦之遺第以魚龍雜居蛇虺多

有擾擾赤蟻薨薨青蠅匪棘則樊無槐亦國維時
海寇方熾郡人戒嚴樓船雲齊礮石林列與諸生
談藝之暇歎盧循之負固思岳鄂之重來徑欲米
浙矛頭艦燒雉尾飛羽檄於揖峯亭畔營戰壘於
積穀山前而蒿目徒勞捐髀自哂今者狼烽席卷
鯨浪鏡清我值其屯君遭其秦若夫射堂追靈運
之讌墨池訪逸少之蹤哀陳君舉之諫章表葉水
心之經術媿我恩恩其未暇想君綽綽乎有餘問
字酒多束脩羊美山川借助著述大佳他日歸來

尙希寫似 又跋昔米元章自貴其小行楷不輕
爲人寫惟跋古帖與前賢墨跡用之此序亦駢體
之小行楷也文成隔歲藉何解嘲振而矜之聊以
自贖

縣學明倫堂之右上有明正德己巳年永嘉縣學宮
圖碑在宏治十年永嘉令林廷瓚汪循先後購地
重建之後不知係何人所立細閱圖中房屋堂階
與今全不相同惟所開學宮地基及本學田山每
年應收穀草之數甚爲明析計開資福寺前界牆

永嘉聞見錄

卷上

四

起至號房後轉角牆止共肆拾貳丈牆外金祐屋
地號房後至教官衙牆壹拾叁丈牆外把指揮屋
地西畔北至南石牆共計貳拾陸丈牆外營房屋
東畔至山不計丈數前面擢秀坊東牆起至書院
止通共伍拾伍丈捌尺西後面尖背山腳起至奎
光閣今爲啟聖宮後滴水壹拾叁丈內奎光閣深六丈
至前後滴水闊捌丈捌尺大成殿深柒丈柒尺闊
八丈戟門深五尺闊壹拾肆丈伍尺明倫堂深六
丈六尺闊八丈二尺又附載本縣撥與本學田山

數日計開塗田壹百貳拾捌畝陸分坐落二十二都佃戶金古稀每年計租穀伍拾碩民田壹拾柒畝坐落二十四都原係本都葉道威隱下漏報田每年計租穀貳拾碩肆斗山田貳處計壹拾貳畝坐落十九都原係張浩隱下官山新開墾田計租以下字跡模糊官山叁拾壠坐落十七都每年計其草陸拾担茶園壹處坐落十二都四里大聖殿內係本都葉禹項永告爭茶園佃戶葉以加每年計乾茶壹拾斤碑文今僅存近江三十六都民田共

四十四畝六分七釐兩齋約共收早穀拾貳叁石曬淨約可得叁百觔兩齋又約共收晚穀貳拾貳叁石曬淨約可得壹千觔八都塗田共三十畝零一分五釐兩齋約共收穀十五六石無晚穀曬淨約可得叁百五十觔又塗田三十畝每畝折錢一百六十文兩齋可共得錢四千八百文又塗田二十八畝每畝折錢一百文兩齋可共得錢二千八百文又丁天竹前後山草柴兩齋每年共收三千三百觔又共收茅竹山租錢四千八百文大概除每

年納糧報銷等費及收租人飯食船錢諸款外所餘亦無幾矣爰約錄之以備後人查核焉

據圖載儒學大門之左爲學倉後有奎壁井井之後近左爲訓導衙又後居中爲教諭衙衙後居中有號房五間後近右有向東號房七間後又有向東號房五間居中向南爲青雲館館後居中又有號房五間後近右又有向西號房五間再後卽山脚矣近惟奎壁井青雲館尙存今訓導衙似卽舊教諭衙號房等俱久坍塌廢無存

又據圖載大成殿後爲奎光閣似卽今啟聖宮兩旁舊有號房十餘間今俱廢明倫堂後爲觀頤堂似卽今聚英堂爲教諭署見客之所今教諭署宅門卽在明倫堂後旁爲庖厨所似卽舊活水亭縣志作問水亭誤基又其旁爲教諭署內堂四間前有平屋三間又有竹園似卽於舊奎光閣觀頤堂之間隙地爲之創於何年始於何人今皆無攷

又據圖載櫺星門之右爲書院門後有大方池又後爲書院後有腰牆隔斷後又爲訓導衙在大成殿

之右自書院門起至訓導衙後門俱有大石長牆
爲限

縣學向無忠義節孝祠

縣志云

國朝雍正四年知

二祠俱在縣東

嘉慶二十四年朱滄湄觀察來溫

教諭周君澧謁見時首言及此因擇訓導署外空
隙之地創建兩祠適張鑑湖觀察亦於是時奉諱
歸里襄理其事工竣朱觀察爲文記之碑立祠內
並於訓導署宅門之左置官廳壹間以爲祭祀官
公所春秋二祭兩堂分主之

道光十八年八月二
十五日晚間忽然火

永嘉聞見錄

卷上

七

起兩祠盡行燒燬次年夏間石碑又爲雷擊四段
碑文附錄於後官廳壹間朱訓導亦移建於署內
偏右

永嘉縣重建忠義節孝祠碑記

分巡溫處兵備道朱文翰撰

溫州府知府余溶書

永嘉縣知縣黃靖立石

誠之者貴可與天地參廟焉而饗斯與神祇伍

皇朝雍正紀元

大聖人敦崇名教匡植彝倫極明暨幽

釐正禋祀

敕下直省州縣祀名宦鄉賢別立忠義節孝兩祠俾
所在有司歲時致祭良以圭爲而薦動於人心
陰幽以思通乎化理典至鉅意彌厚也永嘉縣
忠義節孝祠舊在縣學東偏倚夫子之宮牆經
宰官之締構嘉慶丙辰圯於颶邑令倉猝輒奉
忠義羣粟主附於昭忠祠中而就其旁一楹以
祀節孝因陋就簡不中程度昭忠者蓋乾隆丁
未平臺灣之役奉建專祠以祀殉綏諸將士者

也越歲丙子學官錢塘周君灃等白其事於巡
撫部院金谿楊公於是下臺檄始議興復迨今
己卯之歲知永嘉縣宜興黃君靖旣泄官之四
年毅然出廉俸鼎建兩祠相度故基復還舊觀
列棟周垣宏敞堅緻經始以仲冬二日落成於
明年孟陬十日文翰備官斯土適觀厥成乃撰
良辰奉辦香溪毛偕郡守興化余君暨諸僚友
祭拜祠下以告成事以妥神明同官徵予文以
紀顛末予維忠義節孝正教也

詔令建祠命祀也正教昌何憂乎左道命祀崇何慮乎淫祠國之大事在祀與戎繼自今竊願賢令尹吉蠲俎豆必躬必虔既本是心以事神治民更善推所爲於困窮無告於是上格天和自求多福宜有不介而孚不期而至者神其許我哉邑人張君瑞溥官四川敘州郡守方以讀禮家居實趨走左右厥工克忘其勞以迄歲事是亦邦之賢大夫也是宜並書系以四言韻語一章俾歲時歌以侑神其辭曰剛中而忠方外而義

節則義盡孝則仁至其事庸庸菽粟布帛日月其光金玉其質牆宇易摧碑以永諸碑不可磨祠可廢與采采蘋藻悒悒磬笙萬春億秋來格甌城

大清嘉慶二十五年歲次庚辰春二月吉日

朱觀察楹對兩聯甚佳附錄於後

忠義祠

近聖人之居容光必照

遵海濱而處明德惟馨

節孝祠

兒女盡能之一點熱腸三分血性

家庭常事耳察乎天地通乎神明

今縣學明倫堂之左有廳事三楹外題青雲館內祀朱文公查正德年學宮圖碑本有青雲館之名府志又言康熙二十三年創建朱文公祠紳士林兆斗等倡建似非卽在青雲館中而祠在何地亦無明文是否卽今之青雲館無從稽攷舊志載文公乾道間館樂成卽樂清遂講道東臯山麓從游弟子

永嘉聞見錄

卷上

十

甚衆其往來小徑名曰文公巷在樂清而不在永嘉此間嚮風慕道敬立其祠亦宜文公立朝正直不阿屢爲小人傾軋其時有余嘉者上書乞斬朱熹且指蔡元定爲僞黨謝深甫擲其書語同列曰朱元晦蔡季通不過日相與講明其學耳余嘉蟻蝨臣乃敢狂妄如此孫逢吉亦嘗上疏言道德崇高無如朱熹又永嘉葉適水心文集中有爲朱晦菴辨誣疏一篇議論正大言極明暢今已全載入縣志藝文類中

志言郭璞扞城時鑿井二十有八以象列宿今俱無
可指名惟縣學中有二井水頗清甘其一名奎壁
井今在訓導署宅門外築垣跨其上半爲居近者
公汲半爲署內之用其一名煉丹井今在教諭庖
廚階前圖載井之後面有活水亭似卽今庖廚之
基井闌用青石六方成六角形內刻陽文容成太
玉洞天六大字博古圖云古器俱有款識款謂陰
字是凹入者識謂陽字是凸出者
款在外識在內然則此陽字
在內者亦是識也旁無名姓舊傳王羲之書書法
秀整不類俗筆闌外向南又有石刻陽文至治癸

亥菊月丙申朱善敬立莊嚴勝事十六字凡四行
亦莫詳所自阮官保師兩浙金石志載元太玉洞
題字在温州華蓋山似卽指此疑卽
朱善所書志又載王光蘊記畧云太玉洞天在華
蓋山之麓道書稱第十八洞天容成子修真處也

舊有青牛谷五粒松諸遺跡皆蕪沒不可復得惟
煉井尙在井內有竅若門旱涸時兒童篝燈探之
入數百武莫測其底真異境也余因於大旱水淺
時懸長梯令人入下細窺下係大石堆成東面果
有大洞據土人耆老言此洞遠通福建前雨大時

曾涌出鮮荔數枚語近奇異殊不足信惟是洞久無考余嘗往來山麓徧尋不得詢之鄰近及老成留心古跡者皆云並無聞見疑洞卽在井內亦未可知是以井闌上但題洞天不題仙井耳姑存此說質之博聞君子

容成太玉洞天石刻碑

永嘉教諭署竈房階下之右有大井井闌用大青石六方砌成六角形每方石內面刻陽文大字一合成容成太玉洞天六字太字外面又刻陽文小字四行

每行四字云至治癸亥菊月丙申朱善敬立莊嚴勝事共十六字檢温州府志載明王光蘊容成道院記太玉洞天在華蓋山之麓道書稱十八洞天容成子修真處也舊有青牛谷五粒松諸遺迹皆蕪沒不可復得惟煉丹井尙在井內有竅如門旱涸時兒童簪鐙探之入數百步莫測其底真異境也宏治十年改建於墨池里記作於萬曆辛丑十月永嘉縣志亦引嘉靖縣志云華蓋山有容成洞道書謂天下第十八洞天黃帝時容成子於此上昇因名容成太玉之天